



Volumen Epistolarum, Qvas Romani Pontifices, Gregorijs III., Stephanvs III., Zacharias I., Pavlvs I., Stephanvs IV., Adrianvs et Pseudopapa Constantinus miserunt & reges Francorum, Carolvm Martellvm, ...

Gretser, Jacob

[München], 1613

Jtem exemplar Epistolæ Adriani Papæ, ad Domnum Carolvm Regem directa, in qua continentur gratiarum actiones , pro vita & sanitate Domini regis, & vxoris vel filium eius nec non & pro exaltatione ...

[urn:nbn:de:hbz:466:1-65166](https://nbn-resolving.org/urn:nbn:de:hbz:466:1-65166)

*Item exemplar Epistolæ Adriani Papæ, ad
Domnum Carolum Regem directæ, in qua continentur gra-
tiarum actiones, pro vita & sanitate Domni regis, & uxoris
vel filium eius nec non & pro exaltatione sanctæ Dei Ec-
clesiæ, & postulans, vt filium suum ex sacro
Baptismatis fonte suscipere me-
reretur.*

XLIX.

DOMNO excellentissimo filio Carolo, Regi
Francorum, & Langobardorum, atq; patricio
Romanorum Adrianus Papa. Dum nimio
prouocati amore aptum duximus, primitus quidem à
Deo protectæ excellentiæ vestræ, seu spiritualis filiæ
nostræ Reginæ proles, etiam Episcopos & Presbyte-
ros, nec non & vniuersos optimates, cunctumq; præ-
claræ gentis vestræ Francorum populum, ad vestrum
à Deo confortatum regnum pertinentem, his nostris
Apostolicis visitare apicibus, & certos de vestra salute
ac lætos effici, impensius prosperitatis ambientes in-
tegritatem. Igitur dum ad nos reuersi fuerunt Missi
spiritualis matris vestræ, sanctæ Dei Ecclesiæ, à vestigio,
à Deo protecti regni vestri, id est, Reuerendissimus
frater noster Philippus Episcopus, & Megistus, dile-
ctissimus filius noster Archidiaconus, retulerunt no-
bis de fidei & charitatis vestræ constantia, quam erga
B. Petrum, Apostolorum principem, & nostram hu-
militatem habere dignati estis, pro vestre anime mer-
cede. Hoc audito, magno gaudio noster releuatus est
animus, & cœpimus Deo laudes referre, & beato prin-
cipi Apostolorum Petro, pro exaltatione regni ve-
stri, atq; filiæ nostræ, Reginæ, coniugis vestræ, prolis
b etiam

Summ. 35.
Bar. &
Cent.

etiam, & pro cunctis Francis, fidelibus B. Petri Apostoli, atque vestris.

At verò illud, vnde vestrae eximietati per iam dictos nostros Missos, scilicet Reuerendissimum fratrem nostrum Philippum Episcopum, & dilectissimum nostrum Megistum Archidiaconum dignati estis nobis repromittere, vt in sanctam diem Paschae ad limina beati Apostolorum principis Petri, vna cum spiritali filia nostra Regina, Domino auxiliante, propere debuissetis, vt filium, qui nunc vobis procreatus est, à sacro Baptismate, in vlnis nostris susciperemus, sicut terra sitiens imbrem, ita & nos expectantes fuimus mellifluam excellentiam vestram; & dum appropinquasset ipse dies sanctus Paschae, & nullum mandatum de aduentu vestro suscepissemus, aut de Missis vestris, secundum placitum, quod inter nos extiterat, valde tristes effecti sumus. Sed obnixè te petimus, præcellentissime & magne Rex, vt secundum quod inter nos constitit, pro ipso sancto Baptismate nostrum adimplere iubeas desiderium, de eodem eximio vestro filio, quatenus duplex Spiritus sancti gratia in medio nostrum ad crescat, & gemina festiuitatis lætitia nobis celebretur, & hoc deprecamur vestra excellentiam amantissime fili, & præclare Rex, pro Dei amore & ipsius clauigeri regni caelorum, qui solium regni patris vestri vobis largiri dignatus est, vt secundum promissionem, quam polliciti estis, eidem Dei Apostolo, pro animae vestrae mercede, & stabilitate regni vestri, omnia nostris temporibus adimplere iubeatis, vt Ecclesia Dei omnipotentis, id est, B. Petri Apostoli, cui clauis regni caelorum ab omnium opifice, facinorum nexus soluendi, simulq; ligandi attributa est facultas, in omnibus

nibus amplius atq; amplius sancta Dei Ecclesia exalta-
ta permaneat, & omnia secundum vestram pollicitati-
onem adimpleantur, & tunc vobis in caelestibus arcibus
adscribatur merces, & bona opinio in vniuerso mundo.

Et sicut temporibus B. Syluestri, Romani pontifi-
cis, à sanctæ recordationis piissimo Constantino, ma-
gno Imperatore, per eius largitatem, sancta Dei Ca-
tholica & Apostolica Romana Ecclesia eleuata atque
exaltata est; & potestatem in his Hesperiae partibus lar-
giri dignatus est, ita & in his vestris felicissimis tempo-
ribus atq; nostris, sancta Dei Ecclesia, id est, B. Petri A-
postoli, germinet atq; exultet, & amplius atq; amplius
exaltata permaneat, vt omnes gentes, quæ hæc audie-
rint, edicere valeant: *Domine, saluum fac regem, & exau-*
di nos in die, in qua inuocauerimus te: quia ecce nouus
Christianissimus Dei Constantinus Imperator, his
temporibus surrexit, per quem omnia Deus sancte sue
Ecclesie B. Apostolorum principis Petri, largiri di-
gnatus est. Sed & cuncta alia, quæ per diuersos Impe-
ratores, Patricios, etiam & alios Deum timentes, pro
eorum animæ mercede, & venia delictorum in parti-
bus Tuscia, Spoletio seu Beneuento, atq; Corsica, si-
mul & Sauinensi patrimonio, B. Petro Apostolo, san-
ctæq; Dei & Apostolicæ Romanæ Ecclesie cõcessa sunt,
& per nefandam gentem Langobardorum, per annorum spa-
tia abstracta atq; ablata sunt, vestris tēporibus restitu-
antur. Vnde & plures donationes in sacro nostro scri-
nio Lateranensi recõditas habemus, tamē & p̄ satisfa-
ctione Christianissimi regni vestri, p̄ iam factos viros,
ad demonstrandū eas vobis, direxim⁹ & p̄ hoc petim⁹
eximiā præcellentiam vestram, vt in integro ipsa patrimo-
nia B. Petro & nobis restituere iubeatis, & dum omnia

psal. 19.

per vestrum congruum dispositum, sancta Dei Ecclesia effectum susceperit, ipse princeps Apostolorum, B. Petrus, ante tribunal omnipotentis clementiam, pro vestra sospitate atq; longæuitate, & exultatione à Deo confortati regni vestri deprecetur. Magnoperè enim direximus apud vestram eximiam præcellentiam, id est, Reuerendissimum & Sanctissimum fratrem nostrum Philippum & Andream, Episcopos, seu Theodorum Ducem nostrum, quibus & in ore posuimus, vt vestræ à Deo protectæ excellentiæ minutius enarrare debeant; quibus & eis in omnibus credere debeatis & solita benignitate eos suscipere iubeatis, pro amore fautoris vestri, B. Petri Apostoli, vtdum ad nos reuersi fuerint cum effectu causæ, ante Confessionem ipsius Dei Apostoli, cum omnibus Episcopis, & sacerdotibus, atque cuncto clero, senatu, & vniuerso nostro populo, pro vestra sospitate atque longæuitate & exaltatione Regni vestri Domino fundere valeamus preces, vt æuis temporibusque eximietatem vestram conseruare dignetur, ad exaltationem spiritualis matris vestræ, sanctæ Dei Romanæ Ecclesiæ, & sicut terrena gaudia largitus est, ita & cœlestia tribuat sempiterna. Incolumem Excellentiam vestram gratia superna custodiat.



Frem